

Headlines

- प्रधानमंत्री नरेंद्र मोदी होरें पोलीस महानिदेशकें ते महानिरीक्षकें दे अखिल भारतीय सम्मेलन दे अखीरले दिन सुरक्षा सरबन्धी महत्वपूर्ण मामलें पर विचार कीता।
- सीमा सुरक्षा बल नै पाकिस्तान थमां घुसपैठ गी रोकने आस्तै जम्मू च 2 होर बटालियनं गी तैनात कीता ऐ।
- चीफ सैक्रेटरी होरें जम्मू कश्मीर च आपदाएं कन्नै निब्वड़ने दी तैयारिएं दा जायजा लैता। ते विस्थापितें-रिफ्यूजिएं दे कल्याण सरबन्धी उपाएं दी अमलावरी दी समीक्षा कीती।
- केंद्री सेहत मंत्री जे.पी नड्डा होरें आम लोकें गी अपील कीती ऐ जे एच.आई.वी एड्स संक्रमित लोकें कन्नै हमदर्दी आह्ला बर्ताव करन।

<><><><><><>

PM-Conference

प्रधानमंत्री नरेंद्र मोदी होरें भुवनेश्वर च पोलीस महानिदेशकें ते महानिरीक्षकें दे अखिल भारतीय सम्मेलन दे अखीरले दिन बक्ख-बक्ख राज्यें ते केंद्र शासित प्रदेशें दे सुरक्षा कन्नै जुड़े दे महत्वपूर्ण मामलें पर विचार कीता। मुख्त तौर पर साइबर अपराध, तटीय सुरक्षा ते माओवादी आतंकवाद कन्नै निब्वड़ने पर चर्चा होई। केंद्री गृह मंत्री अमित शाह, केंद्री गृह सचिव गोबिंद मोहन, राश्ट्रीय सुरक्षा सलाहकार अजीत डोबाल होर बी सम्मेलन च मौजूद न। सम्मेलन च राश्ट्रीय सुरक्षा कन्नै जुड़े दे महत्वपूर्ण मामलें कन्नै निब्वड़ने लेई रणनीति तैयार करने पर मता ध्यान दित्ता गेआ ऐ जिंदे च नमीं तकनीकें जिआं कि drones ते Artificial Intelligence करी पैदा होआ रदी चुनौतिएं कन्नै निब्वड़ना शामिल ऐ। एहदे अलावा आतंकवाद दा मुकाबला करने लेई अपनाई जाने आहली रणनीति पर बी देश दे उच्चे पोलीस अधिकारिएं ते बक्ख-बक्ख सुरक्षा एजेंसिएं दे प्रमुखें आसेआ विचार कीता जा'रदा ऐ। प्रधानमंत्री होरें होरनें कन्नै पोलीस दे कार्रवाईएं सरबन्धी ते मूल ढांचागत सुविधाएं सरबन्धी मुद्दें पर गल्लबात कीती। केंद्र सरकार नै मार्च 2026 तगर नक्सली आतंकवाद गी खत्म करने दे लक्ष्य गी पूरा करने तैहत हाल दे म्हीनं च थ्होइ, दी लगातार सफलताएं दे बावजूद राज्यें गी आखेआ ऐ जे लक्ष्य पूरा होने तोड़ी ढिल्ले नेई पौन। मगरा प्रधानमंत्री होर जेहड़े पिछले शुक्रवार थमां भुवनेश्वर दे 3 दिनें दे दौरे पर ऐ, संज्ञा लै दिल्ली परतोई गे।

<><><><><><>

BSF-Batallions

सीमा सुरक्षा बल-बीएसएफ नै जम्मू प्रांतै च बन्ने पारा घुसपैठ रोकने ते आतंकी गतिविधिएं पर रोक लाने लेई 20 ज्हार कोला मते कर्मिं दियां दऊं ज्हार कोलां मते कर्मिं दियां 2 नमियां बटालियनां तैनात करने दा कम्म मुकम्मल करी लैता ऐ। इयां हाल च प्रांतै च आतंकी घटनाएं च चानचक्क आई दी तेजी गी ध्यानै च रखदे होईगू कीता गेआ ऐ। बीएसएफ दे अधिकारिं दा आखना ऐ जे बटालियनां अंतरराष्ट्रीय बन्ने पर पैहले सवां तैनात बीएसएफ बलें दे पिच्छे दुए सुरक्षा घेरे दे तौरा पर लाया गेआ ऐ। इनें 2 बटालियनें गी हाल च गै ओडिशा दे नक्सल विरोधी कारवाइएं आहले इलाकें शा हटाया गेआ ऐ। सयाल शुरू होने कोला पैहले-पैहले अंतरराष्ट्री बन्ने पर इनें बादू बटालियनें दी तैनाती दा कम्म मुकम्मल कीता गेआ ऐ कीजे बर्फबारी दे बाद आतंकवादी घुसपैठ लेई जम्मू प्रांतै आहले बन्ने टप्पने दी कोश्ट करदे न। बीएसएफ भारत दे पच्छमी बन्ने पर गुजरात कोला लेइयै राजस्थान, पंजाब ते जम्मू-कश्मीर दे जम्मू प्रोतै तोड़ी 2 ज्हार 289 किलोमीटर दे इलाके च पूरी मुस्तैदी कन्नै दिन रात बन्ने दी राखी लेई डटे दे रौहंदे न। जम्मू प्रोतै च 485 किलोमीटर दा इलाका पाकिस्तान कन्ने लगदा ऐ जेदे च केई थाहरें पहाड़ियां ते घना जंगली इलाका बी पौंदा ऐ।

<><><><><><>

CS-Disaster

चीफ सैक्रेटरी अटल डुल्लू होरें जम्मू-कश्मीर च आपदाएं कन्नै निब्वड़ने दे उपाएं दा जायजा लैता। उनें आपदा प्रबंधन, राहत सहायता ते पुनर्वास विभाग दी बैठक च निदेश दित्ते जे इस माली बरे दे अखीर तगर एमरजेंसी ऑपरेशन सेंटर गी सक्रिय कीता जा। उनें पहाड़ी झीलें दा दौरा करिए झीलें दे फट्टने करी हाड़ औने दी संभावनाएं दा अध्ययन करने पर जोर पाया। मीटिंग च विद्यार्थिं ते स्वयंसेविं गी राहत गतिविधिं च भूमिका निभाने आस्तै सिखलाई देने लेई बी आखेआ गेआ। एहदे अलावा पुनर्वास पैकेज तैहत पी.ओ.जे.के ते पच्छमी पाकिस्तानी रिफ्यूजिं ते पी.एम पैकेज तैहत कश्मीरी पंडित मलाजमें लेई घोशणाएं दी अमलावरी च हासिल प्रगति दा बी जायजा लैता गेआ।

<><><><><><>

Army-Medical

फौज आसेआ राजौरी जिले दे समोट आहले सरकारी हायर सैकेंडरी स्कूल च बच्चिएं लेई सेहत जांच आहले इक कैप दा सरिस्ता कीता गेआ। इस कैप दा मकसद इलाके दे विद्यार्थिएं दी उंदे स्कूलै च गै सेहत जांच करना, उनेंगी अपनी निजी साफ-सफाई, सेहत ते तंदरूस्ती दे महत्वै बारै जागरूक करना हा।

<><><><><><>

RNU Announcement

आकाशवाणी दा क्षेत्रीय समाचार एकांश जम्मू ओंदी 6 दिसम्बर गी अपना 54मां स्थापना दिवस मनाने जा'रदा ऐ। इस सिलसिले च एकांश केई सारे कार्यक्रमें दा आयोजन करै करदा ऐ। स्थापना दिवस आले रोज 6 दिसम्बर गी बडलै साढ़े 9 बजे 30एं मिंटे दा इक विशेष कार्यक्रम प्रसारत कीता जाग जेह्दे क्षेत्रीय समाचार एकांश दी भूमका, जिम्मेवारिएं ते कम्म करने दे तौर तरीके दे इलावा, इत्थे कम्म करी चुके दे अधिकारिएं कन्नै गल्लबात बी शामिल होग। अपने कर्मिएं दी होसला अफजाई लेई ऐकती स्थापना दिवस दे मौके पर उनेंगी सम्मानित बी कीता जाग जिंदे च 2024 ब'रे दे बेह्तरीन समाचार सम्पादक, डोगरी ते गोजरी दा बेह्तरीन समाचार वाचक ते अनुवादक, बेह्तरीन जिला संवाददाता ते जनरल स्टाफ श्रेणी च बेह्तरीन कर्मी शामिल ऐ। इस मौके पर 2024 आले लोकसभा ते विधानसभा चुनाएं दरान आकाशवाणी दे विशेष कार्यक्रमें लेई सैह्योग ते योगदान देने आलें गी बी सम्मानित कीता जाग। समाचार एकांश दे स्थापना दिवस लेई स्हाड़े श्रोता ते जम्मू प्रांतै दे मन्ने-परमन्ने दे लोक अपनियां शुभ कामनां देआ करदे न।

<><><><><><>

AIDS-Day

केंद्री सेहत ते परोआर कल्याण मंत्री जगत प्रकाश नड्डा होरें आम लोकें गी अपील कीती ऐ जे एच.आई.वी एड्स संक्रमित लोकें कन्नै हमदर्दी आहला बर्ताव करन ते उंदे मनुक्खी अधिकारें दी राक्खी करन। इंदौर मध्य प्रदेश च विश्व एड्स दिवस पर कराए गेदे इक कार्यक्रम च उनें आखेआ जे केंद्र सरकार नै एचआईवी प्रीवेंशन कनून 2017 तैहत संक्रमित लोकें कन्नै भेदभाव बंद कराने

लेई कम्म शुरू कीता ऐ। श्री नड्डा होरें आखेआ जे प्रधानमंत्री नरेंद्र मोदी हुंदे नेतृत्व च सरकारै टेस्ट ते ट्रीट नीति लागू कीती जेदे नतीजे च देश च एड्स करी होने आहली मौतें च 79 प्रतिशत कमी आई। नमें संक्रमण आहले मामलें च बी 44 प्रतिशत कमी आई ऐ। चिकित्सा खेत्तर च भारत दी विकास यात्रा बारै उनें आखेआ जे भारत नै इस बिमारी दे इलाज आस्तै सस्ती ते मती असरदार दवाइएँ गी तैयार करने च कामयाबी पाई ऐ। उनें मेद दस्सी जे 2030 तक़र देश इस बिमारी थमां मुक्त होई जाग।

<><><><><><>

Aids-Day Kathua

एड्स बारै कुल संसारी ध्याड़े दे मौके पर अज्ज कठुआ जिले च मैहकमा सेहत ते जिला कनूनी सेवा प्राधिकरण कठुआ आसेआ इक जागरूकता कार्यक्रम दा सरिस्ता कीता गेआ। इस मौके लोकें गी एड्स दे बारे च जानकारी, एहदे कारणें, उपचार ते बचाऽ बारै च बी दस्सेआ गेआ तां जे समाज च एहदे फैलने दे खतरे कोला बचेआ जाई सकै।

<><><><><><>

Minister-Rana

पर्यावरण मंत्री जावेद राणा होरें कल जम्मू दे मंडाल इलाके च अपना वन सूरें चक च लोआए गेदे अक्खी दी जांच दे 5 रोजा मुफ्त कैप दा दौरा कीता ते आखेआ जे सरकार दा मकसद लोकें दे घरें कश हर सेहत सेवा उपलब्ध कराना ऐं एहू कैप तवि वेलफेयर सोसायटी आसेआ मोतिया बिंद दा पता लाने ते उंदे आप्रेशन लेई उंदी शनाख्त करने दे मकसद कन्नै लोआया गेआ। राणा होरें आखेआ जे तवि वेलफेयर सोसायटी आंगर दे गैर सरकारी संगठन लोकें गी म्यारी सेहत सेवा घरै कश उपलब्ध कराने च सरकार दा सहयोग करा करदे न।

<><><><><><>

Bio-Mining

पुंछ जिला प्रशासन नै मुंसीपल काउंसल पुंछ दे सहयोग कन्नै पुलत्स नदी दे कंडे पर इक मुहिम शुरू कीती गेई ऐ जेदा मकसद इक परियोजना दे रूपै च शकरनगर इलाके शैहरै दा कूड़ा-कचरा ते मलबा सुट्टने करी पैदा चुनौतिएं दा नबेड़ा करना ऐ। इस बारै आकाशवाणी कन्नै गल्ल करदे होई जिला विकास कमिशनर विकास कुंडल होरें आखेआ जे केइउएँ बरें थमां किट्टा करिये रक्खे

गेदे इक कूडे दे ढेर गी इस परियोजना दे तैहत ढाया जाग। उनें आखेआ जे अंदाजन कोई 6 ज्हार मीट्रिक टन दे इक कचरे दे ढेर दे जैविक खनन पर 82 लक्ख 20 ज्हार रपे कोला मता खर्चा औग ते एहदे लेई कोई 2 महीने दा समा लग्गोग।

<><><><><><>

Army-Mela

ऑप्रेशन सद्भावना तैहत फौज आसेआ मरमट मेले दा सरिस्ता कीता गेआ जेदे च जम्मू-कश्मीर दे बक्ख-बक्ख हिस्सें थमां आए दे गुज्जर बकरवाल समुदाय दे लोके हिस्सा लैता ते बक्ख-बक्ख रंगा-रंग कार्यक्रमें च शिरकत कीती ते सांस्कृतिक ते खेड्ड गतिविधिएं जिंदे च गीत संगीत, नाच, पेंटिंग, रस्साकशी मकाबले ते होर दुए खेड्ड शामिल हे।

<><><><><><>

ICC-Shah

जय शाह होरे अज्ज इंटरनेशनल क्रिकेट काउंसल दे अध्यक्ष दा कार्यभार साम्भी लैता। 36 बरें दे जय शाह होर 5 साल बी.सी.सी.आई दे सैक्रेटरी रेह ते आई.सी.सी दे बोर्ड ऑफ डायरेक्टर नै सर्व सम्मित कन्नै उनेंगी अध्यक्ष नियुक्त कीता। एहदे शा पैहले न्यूजीलैंड दे Greg Barelly होर आई.सी.सी दे अध्यक्ष हे। जय शाह होरे ओहदा साम्भने पर जारी उद्घाटनी बयाने च आखेआ जे उनें 2028 च लास एंजलस च होने आहली ओलंपिक खेड्डें च क्रिकेट गी शामिल करने ते महिला क्रिकेट गी बढ़ावा देने पर ध्यान देडन।

<><><><><><>

Hockey

हाँकी भारत दी मर्दे दी जूनियर टीम नै कल ओमान दे मस्कट च जूनियर एशिया कप दे पूल-ए मैच च चीनी ताइपे गी 16-0 कन्ने हराई दित्ता। इस मकाबले च दिलराज सिंहने 4 गोल कीते जिसलै जे रोशन कुजूर नै इक दे बाद इक उपरोतलीत्रै गोल करियै हैट्रिक लाई। इस जित्त कन्नै भारत कुल 9 अंक हासल करियै पूल-ए च सब्बने शा उप्पर ऐ। भारत दा अगला मकाबला अज्ज रातीं साड्डे 8 बजे कोरिया कन्नै होग।

<><><><><><>